

Protocol no. 82
Sezzüda da mardi, 7 december 2010, 20.00 – 22.50

Preschaints: Jon Carl Rauch; Chasper Alexander Felix, Georg Salomon, Marianne Werro-Lehmann, Jachen Andri Schmidt e Rico Zini (protocol)
Seraina Felix (tractanda 718)

718 9 **FINANZAS ED IMPOSTAS**
Preventiv d'investiziun pel 2011

Seraina Felix, commembra dal Cussagl da socula, orientescha in detagl sur da l'investiziun previsa in connex culla sanaziun dals s-chaluns gronds sülla piazza da scoula. Ils s-chaluns sun privlus ed in ün fich nosch stadi. Id es premiss da far üna s-chala plü stretta ed ün mürin. Il Cussagl cumünal piglia incunter l'infuormaziun ed ingrazcha per l'orientaziun.

Protocols

Il protocol no. 80 dals 22 november 2010 e'l protocol no. 81 dals 29 november 2010 vegnan approvats.

719 021 **FABRICA**
Cas estetic da fabrica

Il schef da fabrica orientescha al Cussagl cumünal, cha la Cumischiun sindicatoria haja constattà chi saja gnü dat in schner 2009 ün permiss da fabrica chi nu's cunfetscha a la ledscha da fabrica dal Cumün da Sent. El orientescha, davò avair gnü üna sezzüda culla Cumischiun sindicatoria, ch'el haja tut aint il parair da la chüra da monumaints e dal planisader cumünal. Tuots duos han dat giò ün rapport independent cul cuntgnü, cha per üna part da quel fabricat nu vess mai, resguardond l'art. 31 da la ledscha da fabrica (estetica), pudü gnir dat ün permiss da fabrica e chi nu saja gnü agi culla chüra toccanta a regard l'estetica. Cun quai ch'id es gnü realisà tenor permiss da fabrica valabel, nu daja ingüna pussibilità da pretender davopro müdamaints dal patrun da fabrica. Il Cussagl cumünal piglia incunter las intimaziuns dals perits, co chi's pudess megldrar la situaziun in quel lö in connex cun üna prossma etappa da fabrica e co chi's po evitar cas da repetiziun sumgliaints.

720 115 **SERVEZZAN DA LAVINAS**
Rapport da la cumischiun da lavinas

Il capo prelegia il rapport da la cumischiun da lavinas. Il Cussagl cumünal til piglia a cogniziun.

721 860.313 Cumprita da forza electrica, CCC-OEE
Cunvegna – Cumüns concessiunaris e la Ouvras electricas d’Engiadina

Il capo orientescha sur da la cunvegna tanter ils Cumüns concessiunaris e las Ouvras electricas d’Engiadina. Ella da la pussibilità als cumüns da spordscher als abitants ed a l’economia d’urant ils prossems 40 ons predschs d’energia electrica fich favuraivels, facilmaing ils plü favuraivels in Svizra.

Il Cussagl cumünal decida da propuner a la radunanza cumünala da far bun quista cunvegna.

722 9 FINANZAS ED IMPOSTAS
Preventiv cumünal 2011 – Quint curraint

Il Cussagl cumünal repassa per la seguonda jada il quint da gestiun pel 2011 e discuta sur da differents posts. Vezziond las investiziuns i’ls prossems ons decida il Cussagl cumünal da propuner a la radunanza cumünala da laschar il pè d’impostas sün 120 %. Per survgnir raps da l’egualisaziun da finanzas es ün % da 120 üna premissa.

Il Cussagl cumünal propuona a la radunanza cumünala da far bun il preventiv dal quint curraint pel 2011.

723 9 FINANZAS ED IMPOSTAS
Preventiv cumünal 2011 – Quint d’investiziuns

Illa seguonda lecziun dal preventiv d’investiziuns vegnan plüssas investiziuns, chi nu sun uossa amo necessarias, spostadas süls prossems ons.

Il Cussagl cumünal propuona a la radunanza cumünala da far bun il preventiv d’investiziuns pel 2011.

724 Varia
Purtret da Sent

Ün signur da la Bassa ha offri al Cumün ün purtret (aquarel) da Sent ch’el vaiva aquistà. Tenor el tockess quel purtret illa chasa cumünala. L’offerta pel purtret s’amunta a fr. 1'500.--. Il Cussagl cumünal decida da na entrar sülla offerta.

L’actuar: